

EUSKO LEGEBILTZARRA. Jaurlaritzak oposizioari egotzi dio aurrekontuak onartu ez izana

Aurrekontuen eztabaidan abstenitzea «gobernuaren esku» utzi du Batasunak

EAJk, Eak eta IUk euren zuzenketa partzialak onartuta, Batasunak ez luke kontra bozkatuko

Edurne Begiristain | GASTEIZ

Datorren asteazkenean EAEko aurrekontuen legearen eztabaidan Batasunaren jarrera zein izango den argitu zuten atzo Jone Goirizelaia eta Antton Morcillo Batasuneko legebiltzarkideek. Morcillok azaldu zuenez, Batasunak «eraikuntza nazional eta sozialarekin» zerikusia duten zuzenketa partzial guztiak eramango ditu 23an Eusko Legebiltzarreko osoko bilkurara. Jaurlaritza eratzen duten taldeen esku utziko dute zuzenketa horiek onartzea eta, horrela, Batasunaren abstenizioa «irabaztea» aurrekontuen bozketan. Hori gertatuko balitz, aurrekontuak onartuko lirateke.

«Hori da EAEko gobernuak mahai gainean izango duen eskaintza politikoa, eta beraiei dagokie baietza edo ezetza ematea», azaldu zuen Morcillok. Batasuneko legebiltzarkideak adierazi zuenez, herenegun Ogasun batzordean hiruko gobernuak PP eta PSE-EEekin batera atzera bota zituen zuzenketa horiek «egungo esparrutik jauzi kualitatiboa» egitea adierazten dute, eta, besteak beste, Ikastolen, Oinarrizko Errentaren eta Etxebizitza Sozialaren aldekoak dira.

Morcillok EAJren jarrera salatu zuen eta, iritziz, «Euskal Herriko gehiengo soziala ez dator bat EAJren estrategia politikoarekin». Hiruko gobernuak PP eta PSE-EEekin bat egitean «abertzaleen kontrako blokea» eratu dutela kritikatu zuen, eta eraikuntza nazional eta sozialaren bidetik joateko «borondaterik eza» leporatu zien. «Argi gertatu da Jaurlaritzak ez duela borondaterik bide hori jorratzeko, indarrean dagoen markoa kudeatzen jarraitzekoa baizik», esan zuen Morcillok.

«Erantzukizuna» oposizioak duela adierazi du Imazek

Josu Jon Imaz Eusko Jaurlaritzako bozeramailearen iduriko, berriz, PPK, PSEk eta Batasunak «ezetza koalizioa» eratzen dute, Jaurlaritzaren aurrekontuak blokeatzen dituztelako, eta oposizioari ohartarazi zion osoko bilkuran aurrekontuak berriro atzera botatzen badituzte, haien erantzukizuna izango dela, eta ez Jaurlaritzarena. «Gobernuak egin beharrekoa bete du, eta aurrekontuen zirri-



MIREN SAEZ

Jone Goirizelaia eta Antton Morcillo Batasuneko parlamentarioak, atzo, Eusko Legebiltzarrean.

ESANAK

ANTTON MORCILLO (Batasuneko legebiltzarkidea)

«Euskal Herriko gehiengo soziala ez dator bat EAJk aurrera daraman estrategia politikoarekin»

JOSU JON IMAZ (Eusko Jaurlaritzako bozeramailea)

«Gobernuak egin beharrekoa egin du; orain PP, PSE-EE eta Batasunaren esku dago erantzukizuna»

RAFAEL LARREINA (Eako idazkari ordea)

«PPren blokeoari aurre egiteko, Lizarrako ituna ahalbidetu zuen prozesuaren antzekoa behar dugu»

ANTTON KARRERA (EB-IUko bozeramailea)

«PP, PSE-EE eta Batasunaren arteko batasunak gizarte sektore behartsuenei egiten die kalte»

RAMON RABANERA (Arabako ahalzun nagusia)

«Ibarretzek ez du elkarriketarako borondaterik, ezin baititu aurrekontuak aurrera atera»

borroa aurkeztu du. Orain Batasunaren, PPren eta PSE-EEren esku dago», adierazi zuen. Ildo horretan, PP eta PSEri leporatu zien elkarriketarako «borondaterik ez izatea». Izan ere, azpimarratu zuen herenegun gobernuak haien 75 zuzenketa partzial onartzeko prest zegoela, baina ezin izan zutela, azkenean ez zituztelako aurkeztu.

Bestalde, Josune Ariztondo EAJko EBBko idazkariak «larria eta eskandalugarria» iritzi dio Gasteizko Legebiltzarreko egungo egoerari, eta esan zuen ezinezkoa zela akordiorik lortzea «akordiorik egin nahi ez dutenekin».

IUko legebiltzarkide Antton Karrerak ere hiru talde horiek bat egiten dutela salatu zuen,

eta «batasun» horrek gizartearen sektore behartsuenei kalte egingo diela kritikatu.

Rafael Larreina EAKo idazkariorde nagusiaren arabera, PPren «blokeo politikari» aurre egiteko, Lizarra-Garaziko ituna ahalbidetu zuen prozesuaren antzekoa bultzatu beharko litzateke. Larreinen ustez, prozesu berri horretan sozialistek eta Batasunak parte hartu beharko lukete, baina azken horrek «bide politikoaren aldeko apustua egin beharko luke».

PPk boto partikularren txosten juridikoa eskatuko du

PPk Ganberako letradunei txosten juridikoa eskatuko die, betiere jakin nahian EAJk, Eak eta IUk eskubidea duten boto partikularra erabiltzeko eta 23ko osoko bilkurara Aurrekontuen Legearen eztabaida eramateko. Izan ere, Leopoldo Barreda PPko eledunaren ustez, boto hori erabiltzeko egoera ez da sortu. Bestalde, Ramon Rabanera Arabako ahalzun nagusiaren iritziz, «lehendakariak ez du elkarriketarako borondaterik, ezin baititu aurrekontuak aurrera atera».

PSE-EEko eledun Rodolfo Aresek, berriz, atzo adierazi zuen bere taldeak aurrekontu legearen kontra bozkatuko duela, eta erantsi Jaurlaritzak elkarriketaren bidea ibili beharko lukeela «herri honen arazoa konpontzeko».

ERREFUXIATUAK

Frantziaren jarrera salatu du Europako giza eskubideen batzordeak

Erredakzioa | BAIONA

Europako giza eskubideen batzordeko ordezkari batek Frantziaren jarrera salatu zuen Luxenburgoren, atzo. Euskal iheslariak egoteko baimen agiriak ukatzen baitizkie, Frantziari «Europako legea urratzea» egotzi zion. Adierazpen horiek Europako Batasuneko justizia gortean egin zituen. Aitor Oteizaren kasua aztergai zen bertan. 1995ean Parisen konfinatu zuten, eta 1997an administrazio auzitegiak konfinazio hori hautsi zuen. Frantziako Gobernuak helegitea aurkeztu zuen, baina helegite gorteak hauste hura berretsi zuen. Gobernuak Luxenburgoko gortearen esku utzi zuen auzia, eta atzo aztertu zuten. Gorte horretan hamabost epaile dira, eta datozen hiletan emanen dute erantzuna.

EPAITEGIAK

Zortzi hilabeteko zigorra ezarri diote LABeko Komunikazio arduradunari

Erredakzioa | DONOSTIA

Espainiako Auzitegi Gorenak zortzi hilabeteko espetxe zigorra ezarri dio Jesus Maria Ariznabarreta LABeko Komunikazio arduradunari, agintariei erresistentzia egitea egotzita. Gertakariak 1997ko otsailaren 7an izan ziren Bilbon, Herri Batasuneko Mahai Nazionalaren atxiloteta salatzeke egindako manifestazioan.

Pankarta zeramatenak identifikarazi zituen Ertzaintzak, baina manifestariak ez zela beharrezkoa erantzun zioten. Orduan, tirabirak izan ziren Ertzaintzarekin.

Ariznabarreta Bilboko Auzitegi Probintzialean epaitu zuten, eta horrek errugabetzat jo zuen. Fiskalak, baina, helegitea jarri zuen, eta orain Auzitegi Gorenak zigortu egin du. LABek epaia gogor «errefusatu eta salatu» zuen atzo, prentsa ohar batean.